

LA QUOTIDIANA

FMR Fundaziun Medias Rumantschas, Via da Masans 2, 7000 Caira, 081 544 89 11, redacziun@fmr.ch



Cudeschs rumantschs a Berna

A partir dad oz, gievgia datti litteratura rumantscha en la biblioteca da Kornhaus a Berna.

Pagina 2



Co la pestga è sa midada ils ultims decennis

La pestga d'avant 40 onns ed oz en il chantun Grischun nun è strusch pli cumparegliabla.

Pagina 6

FMR FONDAZIUN MEDIAS RUMANTSCHAS



GRISCHUN

Nov cudesch cun satira rumantscha da Roman Caviezel

Quest venderdi ha lieu a Caira la vernissascha dal nov cudesch «Palaver for ever» da Roman Caviezel. Il cudesch or da la collecziun «Ord chadaina» da la Chasa Editura Rumantscha preschenta satira en sursilvan ed en rumantsch grischun. Ils texts curts e murents vegnan accumpagnads dad illustraziuns da la caricaturista Marina Lutz. Ensemen cun la FMR ha l'autur discurre davart ses emprims cudesch publicats, davart satira rumantscha ed era davart litteratura en general. Tranter auter ha el tradì ch'el saja ina persuna da linguas e che la litteratura saja insatge impurtant per el. (fmr/aj)

Pagina 3

ENGIADINA

Ûn «mini sguard» i'l muond da las medias



La moderatura dal Minisguard, Élin Batista (a dretta), cun üna scolara da Bever düraunt la visita dad RTR quist'eivna. FOTO MARTIN CAMICHEL

Quist'eivna ho la scoula da Bever üna visita pü speciela da Caira, nempe dad RTR. Da lündeschdi fin gövgia haun ils scolars e las scolaras da la scoula fin tar la sesevla classa pudieu imprendder a cugnuescher pü dastrusch las diversas medias – da fotografar, registrar audio e televisiun fin a moderer. Uschè sun naschidas diversas emischiuns da radio, podcasts ed üna emischiun dal Minisguard. Il format «RTR sin visita» do que già daspö var tschinch ans, ma la visita a Bever d'eira eir per RTR üna speciela. Que d'eira nempe la prüma vouta cha tuot la scoula e la scoula s'haun partecipos al proget. Ed impü es eir auncha gnieu emiss per la prüma vouta cul radio live e que our d'ün busin sülla piazza da scoula da Bever. Hoz, gövgia es la granda saireda pels scolars e las scolaras, cur ch'els paun musser lur prodots a las famiglias ed amihs in occasiun d'üna premiera publica illa sela gimnastic da Bever. (fmr/cam)

Pagina 7

SURSELVA

Vendita da pèschs ambulonta

Dapi tschun onns ei Martin Gieriet da Panaduz sin tura en Surselva, el Plaun ed en Purtenza cun sia stiziun da pèschs mobila. Wumba senumna la fatschenta che venda var 20 specias da pèschs dalla Svizra e digl'exteriur. A Mustér ed a Glion retscheivan Martin Gieriet e sia consorta Claudia lur clientella mintgamaì il mardis suentermiezdi. La motivaziun d'entscheiver culla vendita da pèschs seigi stau sia amur per il pèsch sco nutriment. «Jeu mez hael già adina giu fetg bugen pèschs e tuttenina hael jeu giu l'idea da realisar in stan da vendita mobil.» Il num Wumba stat buca per in delfin ni per in auter pèsch preferiu dil vender da pèschs Martin Gieriet. Wumba ei semplemein il surnum da Martin Gieriet. (fmr/mg)

Pagina 6

La via ella Val da Crappa ei rumida

Damaun venderdis duei la via denter Sevgein e Riein puspei vegnir aviarta sch'ei dat neginas supresas nunspitgadas. Quei ha igl Uffeci cantunal da construcziun bassa a Glion communicau sin damonda dalla FMR.

MARTIN GABRIEL/FMR

Avon duas jamnas ha ina gronda bova da crappa tschaffau la via da Riein sin in tschancun pli liung ella Val da Crappa e devastau la via da colligiaziun denter Sevgein e Riein. Malgrad ch'ins ha stuiu spitgar entochen l'jamna vargada cun las lavurs da rumida pervia dall'aura da plievgia e neiv, ein las lavurs da rumida ussa prest terminadas. Il menader digl Uffeci cantunal da construcziun bassa en Surselva, Eugen Duff, di che la via da Riein sappi puspei vegnir aviarta damaun venderdis sut la cundiziun ch'ei detti neginas malauras nunspitgadas. La bova d'avon duas

«Da cumparegliar la bova da 2015 cun quella da 2024 ei falliu.»

Eugen Duff, menader digl Uffeci cantunal da construcziun bassa en Surselva

jamnas ha menau oragiu ella val denter 300 e 400 meters cubics material.

Quella gada ella Val da Crappa

«Da cumparegliar la bova da 2015 cun quella da 2024 ei falliu», di Eugen Duff. «Igl onn 2015 hai dau ina bova da crappa cun fetg bia material sill'altezia dalla Val Schlusaus. Uonn avon duas jamnas eisi vegniu giuado ina bova cun gronda crappa pli ensi sil tschancun denter Sevgein e Riein ella Val da Crappa.» Suentar che la via ei rumida eisi da montar las palissadas da segirtad, ina nova gardetscha e da pinar la cuvrada dalla via. Co la via duei vegnir segirada a liunga vesta vegnan las instanzas politicas a decider. Pagina 5

«Cun que ch'èau d'he già fat tschinch intervistas, sun eau quel chi ho fat las pü bgeras da tuot la scoula.»

Bruno, il scolar da l'emprima classa a Bever raquinta da sias experientschas durant l'emna speziala cun emissiums da radio, podcasts e televisiun. – Pagina 7



FOTO GION NUTEGN STIGIER

Peschs, liongias e schlagher

Mors on igls peschs fitg bagn e chegl gio igl ampren de dalla pestga grischuna agl Lai da Burvagn an Surses (varda foto). An strusch en'oura on igls radond 30 pastgeders e la pastgedra tgappo otg peschs. Er la FMR è lavada la dumang bod ed eida alla riva digl lai, noua tg'igls pastgeders passiuos on per gronda gio passanto la notg ainten rulotta u tenda per esser pronts las 05.00. Malgro gl'ampren de da pestga on els per pitschens discurs davart igl lai scu inspiraziun per canzungs da schlagher, la liongia segl gril e la cumpagneia anturn igl fi tg'è gist schi impurtanta scu la pestga sezza. (fmr/gns/sab)

Pagina 8



40018



Servetsch d'abunents e da distribuiziun: tel. 0844 226 226 mail: abo@somedia.ch